

laburrean

■ Debre ministroak dagoeneko 23.300 etorkin kanporatu ditu Frantziatik

JEAN LOUIS DEBRE ministro denetik, Barne Ministerioak 23.300 etorkin kanporatu ditu Frantziatik, ez zutelako bertan bizitzeko baimenik. Kanporatutako azkenak 29 errumaniar izan dira, ostegunean hegaldi berezi batean Bukaresteko bidea hartu zutenak. Errumaniarako hau Debrek lege kanpoko etorkinak botatzeko prestatu duen 35. charter hegaldia izan da. Hegaldi horietako gehientsuenak Afrikara joan dira, kontinente horretatik baitatoz Frantzia paperik gabe sartutako etorkin gehienak. Barne Ministerioak jakinarazi duenez, 1995eko maiatzaren 1az geroztik paperik gabeko langileak erabiltzen zituzten ezkutuko 38 lantegi aurkitu dituzte segurtasun indarrek. X

■ Hamasei hilabeteko haur bat ospitalean sartu behar izan dute dosi bat heroina jan ondoren

HAMASEI hilabeteko haur bat Madrilgo Gregorio Marañon ospitalean sartu behar izan zuten ostegun gauean, papelina bat heroina jan zuelako. Haurra arriskutik kanpo zegoen atzo eguerdian, sendagileen tratamenduari ondo erantzun ziolako. Ama —17 urtekoa— ohartu zen haurrak heroina hartu zuela, aita —20 urtekoa— mahai gainean utzitako poltsatxo zabalik ikusi zuelako. Gurasoek ahoa garbitu zioten umeari, baina ospitalera eraman zuten haurra lotan geratzen ari zela ikusita. Aita komisariara eraman zuten eta bertan onartu zuten azken hilabeteotan heroina hartzen duela. Ijito familia hau Madrilgo La Celsa auzo marjinalan bizi da, karabana batean. Adin Txikikoen Fiskaltza eta Madrilgo Komunitateko gizarte zerbitzuek erabaki beharko dute orain umea gurasoekin itzultzen denentz. Bigarren aldia da azaroaz geroztik Madril haurtxo batek gurasoen heroina hartzen duela. X

■ Bonba batek txalet bat txikitu du Korsikan

OLMETTU herriko (Korsika) txalet bat eta bertako garajea txikituta geratu dira, atzo goizaldean indar handiko lehergailu batek eztanda egin ondoren. Leherketak ez zuten zauriturik eragin, izan zenean etxaldea hutsik baitzegoen. Poliziak uste du atentua FLNC historikoak egin duela, talde armatu horren izena margoturik azaldu baitzen etxeko horma batean. X

■ PPK eta Unio Valencianak berritu egin dute Generalitaterako zuten ituna

VALENTZIAKO PPKo zuzendaritzak eta Unio Valenciana (UV) alderdi erregionalistakoak lurralde hori gobernatzeko zuten akordioa berritu dute. UVko zuzendaritza berriak eskatu zuten ituna berri bat egiteko, aurrekoa «eduki politiko gutxiak» zela eta «kargu banatze soila» zirudielako argudiatuta. Jose Luis Olivas PPKo idazkari nagusiak eta Fermin Artagoitia UVkoak ez zituzten akordio berriaren xehetasunak eman nahi izan, baina «12 helburu politiko eta lehentasuneko 32 konpromiso» dituela jakinarazi zuten. PPK eta UVk ez dute oraindik erabaki nork ordezkatzeko duen abenduan hildako Vicente Gonzalez Lizondo Valentziako Gorteetako Lehendakari izan. Gonzalez Lizondo UVren sortzailea izan zen, baina alderditik kanporatu zuten hil baino aste gutxi lehenago. X

■ Gai toxiko baten ihesa izan da Ripolleteko enpresa kimiko batean

DISOLBATZAILE GISA eta nekazaritza lurak fumigatzeko erabiltzen den gai toxiko bat, karbono-sulfuroa, isuri zen atzo eguerdian Ripolleteko (Bartzelona) Ret-Valve enpresa kimikoan. Ihesa 12:35ean gertatu zen, zisterna kamioi bat karbono-sulfuroa enpresaren biltegi nagusietan isurtzen ari zela. Larrialdiko plana berehala jarri zen martxan eta suhiltzaileen zazpi ibilgailu bertaratu ziren. Isurketa ordu erdi geroago kontrolatua zuten. X

■ Convergenciaren eta Unioaren arteko liskarra ez da baretu

ASTEARTE honetan bertan Pere Esteve CDCko idazkari nagusiak eta Ignasi Farreras UDCkoak bi alderdien arteko liskarrak amai zitezen lortutako akordioak ez du erabateko arrakastarik lortu. Herenegun, Felip Puig CDCko antolakuntza idazkariak ziurtatu zuten Unio Convergenciako militanteak bereganatu nahi izan zirela. Eugeni Perez Moreno UDCko bozeramaileak «demokristauen aurkako gurutzada pertsonala» hasi izana leporatu zion atzo Puigi, eta polemika berriro zabaltzea kritikatu zuen. Josep Antoni Duran UDCko buruzagiak, berriz, Puig salaketak gezurtatu zituen, baina onartu zuten Unio de Treballadors UDCren sindikatuak eskaintza egin ziola taxisten buruzagi sindikal zen CDCko militante bati. X



Bruno Megret emaztearen besoa altxatuz FNk Vitrollesen ostegunean egindako azken mitinean.

FLORIAN LAUNETTE / AP

PSk Vitrollesen irregularitateak egiteaz akusatu du ultraeskuina

Hauteskundeen lehen itzulua bertan behera utzi nahi du Angladek

Vitrollesko (Bouches du Rhone) udal hauteskundeetan botoa emateko eskubidea duten 30.000tik gora lagunek bihar erabakiko dute Fronte Nazionaleko (FN) alkatea nahi dutenentz. Irabazteko aukera urriagoak dituen Jean Jacques Anglade sozialistak —oraingo auzapeza— hainbat amarru egiteaz akusatu du ultraeskuina.

Erredakzioa / Donostia

ANGLADEK joan den igandean egindako hauteskundeen lehen itzulua bertan behera geratzeko eskatu zuen atzo. Vitrollesko gaur egungo auzapezaren arabera, Catherine Megret buru duen FNko zerrendak hainbat lege hauste egin zituen lehen itzuli hori irabazteko, besteak beste «berri faltsuak zabaltzea, gezurrezko sondaketak hedatzea, hautes-kartelak era basatian jartzea eta nire izena belzte». «Irregularitate» horientatik guztiengatik lehen itzulua bertan behera uzteko errekurtsoa dagoeneko aurkeztu duela ziurtatu du Angladek. PS bere alderdiak, berriz, jakinarazi du beste errekurtso bat jarriko duela, bere iritziz Fronte Nazionalak legeak dioenaren halako hiru gastatu duela kanpaina honetan. Biharko

hauteskundeak egin dira, hain zuzen ere, 1995koetan Angladek gastuaren muga hautsi zuelako.

Orduko hauteskundeetan Angladek 353 botoko aldea besterik ez zion atera Bruno Megret FNko buruzagi eta auzapezgaia. Megretekin ezin izan du orain aurkeztu, berak ere behar baino diru gehiago erabili zuelako, baina Catherine emaztea jarri du FNko zerrendaburu. FNk irabaziko balu ez bata ez bestea ez lirateke udal politikaz arduraturiko.

Auzitegiek hauteskundeak indargabetzen ez badituzte, Catherine Megretekin irabazteko aukera handiak ditu. Joan den igandeko lehen itzulian, ultraeskuinaren hautagaiak bozen % 46,7 lortu zituen eta lehen itzulian bertan izendatua izateko oso hurbil geratu zen. Botoen % 50,01 behar da horretarako. Ezkerraren sustengua zuen Angladek % 37 bil-

du zituen eta % 16,3 eskuineko gehiengoko Roger Guichard (UDF). Parisko agintaritzak eta Alain Juppe lehen ministroak eskatuta, Guichard bere hautagaitza kendu zuen bigarren itzulirako, baina nahiko gogo txarrez, Angladeren aldeko botoak ez baitu eskatu. Izan ere, Anglade Vitrollesko auzapeza izan da azken 15 urteetan eta ustel irudia du hirian. Auzapez sozialistak bere burua defenditzen du eta diru publikoa bidegabeki erabiltzeagatik bere aurka irekita zegoen auzibidea aurki artxibatuko dutela iragarri du. Angladek ezkerreko alderdi nagusietako buruzagien sustengua jaso zuen asteazkenean izandako mitinean. Bertan izan ziren Lionel Jospin PSko idazkaria, Robert Hue PCFkoa, Bernard Kouchner PRSko bozeramaile eta Noel Mamere burukide ekologista. X

Charonne metro geltokiko sarraskiaren 35. urtemuga gogoratu zuten bart

■ Manifestazio bati oldartzean zortzi lagun hil eta 150 zauritu zituen Poliziak

Allande Sokarros / Baiona

FRANTZIAKO ALDERDI KOMUNISTAK (PCF) egindako deiari erantzunda dozenaka lagun bildu ziren atzo Parisko Charonne metro sarreratik hurbil, toki horretan orain dela 35 urte gertatu zen sarraskiaren gogoratzeke. Izan ere, 1962ko otsailaren 8an, ezkerreko alderdi, sindikatu eta elkar-teek manifestaziora deitu zuten, OAS ultraeskuindar erakunde armatuak Frantzia egiten zituen

atentatu odoltsuen salatzeke.

Roger Frey Barne ministroak manifestaldia debekatu zuen arren, dozenaka mila lagun elkarretaratu ziren. Parisko Poliziarekin liskar gogorak gertatu ziren, eta, ondorioz, zortzi lagun hil ziren eta gutxienez 150 zauritu. Hamar bat polizia ere zauritu ziren. Poliziak errua bota zien manifestariei, eta esan haiek zirela lehendabiziko eraso egileak izan. Alabaina, testigu guztiek azaldu zuten, Poliziak hasieratik oso bortizki ekin zion

elkarretaratua zeudenen aurka.

Gertakari lazgarri hark emozio handia sortu zuen Parisen bertan zein ere Frantzia guztian. Poliziaren erasoaldiagatik bizia galdu zuten zortzi lagun hileta egunean, 500.000 lagun baino gehiago jaitsi ziren kalerat Parisen. Elkarretaratze itzel hartan ez zen liskarrik izan. Langileen munduan, haatik, Charonne metro geltokiko triskantzak oihartzun samina gorde du, eta horren lekuko izan zen bart egindako elkarretaratzea. X

Xirimiri

TXOKOLATEGIA
Gosariak eta Meriendak

Errementari, 40 - TOLOSA - 675223 tel.